

大方廣佛華嚴經卷第二十二 卷二

唐罽賓國三藏般若奉詔譯

入不思議解脫境界普賢行願品

爾時善財童子隨順修行具足功德寂靜音

海主夜神所得解脫觀察彼神所說法門一

一文句皆無忘失於無量深心無量法性一

切方便神通智慧憶念思擇相續不斷微細

分別解了甚深其心廣大證入安住漸行往

詣守護一切城增長威德主夜神所見彼夜

神坐光明普照一切宮殿摩尼寶王大蓮華

藏師子之座百千夜神而為眷屬前後圍遶

現普應一切衆生色相身現普對一切衆生

之前身現不染一切世間身現等一切衆生

身數身現超過一切世間身現調伏衆生隨

轉身現速往一切十方身現圓滿一切大願

身現滅除一切障礙究竟如來體性身現究竟教化成熟一切衆生身善財見已歡喜踊躍心願圓滿欣慶無量頂禮其足遶無數而於前合掌白言聖者我已先發阿耨多羅三藐三菩提心而未知菩薩修菩薩行時云何利益安樂衆生云何以無上攝攝取衆生云何學菩薩道云何住菩薩業云何順諸佛教云何近法王位唯願慈哀為我宣說時彼夜神告善財言善哉善哉善男子汝為救護一切衆生故汝為嚴淨一切佛刹故汝為供養一切如來故汝欲往一切劫救衆生故汝欲守護一切佛種性故汝欲普入十方修諸行故汝欲普入一切法門海故汝欲以平等心徧入一切所知境故汝欲普徧聞持一切如來正法輪故汝欲普隨一切衆生心之所樂

雨法雨故問諸菩薩所修行門善男子我得
 菩薩甚深自在可愛妙音解脫門為大法師
 白繒繫頂於一切法心無所著善能開示一
 切如來深法藏故具大誓願大慈悲力令一
 切眾生住菩提心故能作一切利眾生事積
 聚善根無休息故為一切眾生調御之師令
 一切眾生住一切智道故為一切世間作大
 法雲普雨一切契經法故為一切世間清淨
 法日普照世間令生善根故為一切世間其
 心平等普令眾生增善法故於諸境界其心
 清淨除滅一切不善業故為大導師引導眾
 生令入一切善行中故為諸眾生智慧莊嚴
 令諸世間以智先導諸善行故恒事一切諸
 善知識為令眾生住佛教故善男子我以此
 等法施眾生令生白法求一切智其心堅固

猶如金剛那羅延藏善能觀察佛力魔力常
 得親近諸善知識摧破一切業惑障山集一
 切智助道之法心恒不捨一切智地圓滿白
 淨無礙法門善男子我以如是淨法光明普
 徧覺悟一切眾生種種饒益積集善根增長
 成就助道法時常作十種觀察法界何者為
 十所謂我知法界無量獲得廣大智光明故
 我知法界無邊見一切佛諸神變故我知法
 界無際普入一切諸佛國土恭敬供養諸如
 來故我知法界無畔普於一切世界海中示
 現修行菩薩行故我知法界無斷入於如來
 甚深平等種種圓滿不斷智故我知法界一
 性入於如來圓滿言音隨眾生成心無不了故
 我知法界性淨入於如來過去願海究竟調
 伏諸眾生故我知法界徧諸眾生普賢妙行

悉周徧故我知法界一莊嚴普賢神通善莊嚴故我知法界不可壞一切善根充滿法界不可壞故善男子我作此十種觀察法界隨順解知出生一切廣大善根辦助道法明了諸佛殊勝威德深入如來難思境界又善男子我以如是隨願作意正念思惟得如來十種廣大威德陀羅尼輪普爲衆生演說妙法何者爲十所謂普入一切法海陀羅尼輪普持一切法藏陀羅尼輪普受一切清淨法雲陀羅尼輪普念一切如來智燈陀羅尼輪普演一切如來名號音聲陀羅尼輪普入三世諸佛平等願海陀羅尼輪普入一切諸乘行海速疾圓滿陀羅尼輪普入一切衆生業海淨諸垢障陀羅尼輪疾轉一切業海清淨陀羅尼輪速疾出生一切智海勇猛成就陀羅

光二

三之二

尼輪善男子此十陀羅尼輪以十千陀羅尼輪而爲眷屬恒爲衆生演說妙法善男子我或爲衆生說聞慧法或爲衆生說思慧法或爲衆生說修慧法或爲衆生說一有海法或爲衆生說一切有海法或爲衆生說一如來名號海法或爲衆生說一切如來名號海法或爲衆生說一世界海法或爲衆生說一切世界海法或爲衆生說一佛授記海法或爲衆生說一切佛授記海法或爲衆生說一如來衆會道場海法或爲衆生說一切如來衆會道場海法或爲衆生說一如來法輪海法或爲衆生說一切如來法輪海法或爲衆生說一如來修多羅海法或爲衆生說一如來集會海法或爲衆生說一切如來集會海法或爲衆

光二

四

生說一薩婆若心海法或爲衆生說一切薩婆若心海法或爲衆生說一乘出離法或爲衆生說一切乘出離法善男子我以此等不可說法門爲衆生說善男子我入如是等無差別法界門海說無上法普徧最勝攝諸衆生盡未來劫住普賢行時此甚深自在可愛妙音解脫於念念中修習增長一切菩薩諸解脫門念念充滿一切法界時善財童子白夜神言竒哉聖者此解脫門如是希有如是甚深聖者證得其已久如夜神告言善男子乃徃古昔過世界轉極微塵數劫有劫名無垢焰光世界名法界焰光吉祥雲以現一切衆生業海變化摩尼王爲體形如蓮華淨穢相雜依須彌山極微塵數差別香摩尼王網而住以一切如來過去大願聲妙寶蓮華次

卷二

五

第莊嚴須彌山極微塵數寶蓮華輪圍山周匝圍遶須彌山極微塵數香摩尼寶間錯莊嚴有須彌山極微塵數四天下——四天下有不可說不可說百千億那由他城善男子彼世界中有四天下名種種色妙莊嚴幢中有王都名普寶拘蘇摩光去彼不遠有菩提場名普現法王宮殿影像須彌山極微塵數如來於中出現其最初佛名一切法大聲光明王彼佛出時有轉輪王名無垢面日光明於其佛所聞一切法海旋修多羅悉能受持佛涅槃後其王出家護持正法法欲滅時有千部異佛正法眼分十千門各隨其宜種種說法近於末劫五濁現時諸惡比丘業惑障重種種纏縛多諸鬪諍樂著境界受取無厭不求一切增勝功德樂說王論賊論女論國

論海論及諸世間種種議論不捨外道斷滅見論心生愛染情無捨離時王比丘以正法音而語之言奇哉苦哉佛於無數大劫海中忍種種苦集此法炬云何汝等而生毀滅作是語已上升虛空高七多羅樹身出無量衆色焰雲放種種色大光明網令無量衆生除煩惱熱令無量衆生發菩提心以是因緣彼如來教復於六十千歲而得興盛時彼衆中有比丘尼名法輪變化光是此王女百千比丘尼而爲眷屬聞父王語及見神通光明威力皆發阿耨多羅三藐三菩提心永不退轉諸比丘尼各得三昧名現見如來平等出生及得陀羅尼名一切如來轉法輪金剛光明及得般若波羅蜜名普入一切法門海時法輪變化光比丘尼即得三昧名出生一切佛

光二

六

教光明燈又得此甚深自在可愛妙音解脫得此三昧解脫門故身心柔軟微細適悅便得現見一切法海大聲光明王如來一切所有神通威力善男子於汝意云何彼無垢面日光明轉輪聖王隨彼如來轉正法輪及涅槃後興其末法然大法炬光照世間者豈異人乎今普賢菩薩是其法輪變化光比丘尼即我身是百千眷屬比丘尼即此會中百千夜神是我於彼時守護佛法今百千比丘尼於阿耨多羅三藐三菩提得不退轉又今得現見一切如來平等出生三昧又今得一切如來法輪金剛光明陀羅尼又今得普入一切法門海般若波羅蜜善男子次彼世界有佛出興名無垢法山頂智光明我以種種承事供養令心歡喜次有佛興名法輪圓滿光

明髻次有佛興名法日吉祥雲次有佛興名
法海門妙聲王次有佛興名法日智輪燈次
有佛興名法拘蘇摩幢雲次有佛興名法焰
光山幢王次有佛興名甚深吉祥圓滿月次
有佛興名法智出生普光明藏次有佛興名
出生根本智藏次有佛興名吉祥藏山王次
有佛興名普門智須彌賢次有佛興名速疾
精進幢次有佛興名法寶拘蘇摩吉祥雲次
有佛興名甚深寂靜山光明髻次有佛興名
法焰光明影像月次有佛興名智焰光吉祥
海次有佛興名普賢圓滿智次有佛興名無
上神通智光明王次有佛興名福德焰光開
敷拘蘇摩燈次有佛興名智師子幢王次有
佛興名普日光明王次有佛興名須彌相寶
莊嚴王次有佛興名日光勇猛普照影像次

有佛興名法網覺勝月次有佛興名法蓮華
開敷吉祥雲次有佛興名日輪普光明次有
佛興名普光吉祥大聲次有佛興名師子無
畏金剛那羅延次有佛興名普智勇猛幢次
有佛興名普法開敷蓮華身次有佛興名功
德拘蘇摩吉祥海次有佛興名高山法門光
明藏次有佛興名高山智焰光明雲次有佛
興名普法高山面門光明次有佛興名道場
吉祥月次有佛興名熾然法炬吉祥月次有
佛興名普影像光明髻次有佛興名法速疾
燈幢次有佛興名金剛海幢雲次有佛興名
名稱山吉祥雲次有佛興名栴檀吉祥月次
有佛興名普吉祥拘蘇摩威德光次有佛興
名照一切衆生光明王次有佛興名功德蓮
華吉祥藏次有佛興名香焰普光明王次有

佛興名波頭摩花因次有佛興名衆相山毗
盧遮那次有佛興名普音聲名稱幢次有佛
興名須彌山普門光明次有佛興名法城吉
祥光明次有佛興名大樹山威德次有佛興
名普吉祥毗盧遮那幢次有佛興名吼法海
大音聲光次有佛興名出生威德一切法官
殿次有佛興名普智最勝光次有佛興名最
勝吉祥相次有佛興名法力勇猛幢次有佛
興名轉法輪妙音聲次有佛興名功德焰冠
智慧光次有佛興名出生吉祥法輪月次有
佛興名法輪蓮華毗盧遮那幢次有佛興名
寶蓮華光明藏次有佛興名寶吉祥雲山燈
次有佛興名普清淨拘蘇摩次有佛興名種
種吉祥焰須彌藏次有佛興名焰輪圓滿山
王次有佛興名福德雲種種色次有佛興名

法山雲幢王次有佛興名功德山王光明次
有佛興名法日雲燈王次有佛興名法雲名
稱徧滿王次有佛興名法輪雲次有佛興名
開悟菩提智威德幢次有佛興名普照法輪
吉祥月次有佛興名摩尼金山威德賢次有
佛興名妙高吉祥威德賢次有佛興名賢德
廣大光次有佛興名普智慧妙聲雲次有佛
興名法力吉祥功德山次有佛興名吉祥雲
香焰王次有佛興名金色摩尼山妙音聲次
有佛興名頂髻藏出一切法圓滿光明雲次
有佛興名法輪熾盛威德王次有佛興名無
上出生威德次有佛興名普精進炬光明雲
次有佛興名三昧印廣大智慧海光明冠次
有佛興名妙寶吉祥威德王次有佛興名法
炬寶帳妙音聲次有佛興名普照虛空界無

畏法光明次有佛興名相好莊嚴幢次有佛興名種種色光明焰山雲次有佛興名照無障礙法虛空光明次有佛興名妙相花開敷身次有佛興名最勝世主妙光明音次有佛興名一切法三昧妙光明音次有佛興名妙辯才法音功德藏次有佛興名熾然光明法海妙音雲次有佛興名普照三世大光明相威德王次有佛興名普照法輪吉祥山廣大光明次有佛興名法界師子光次有佛興名毗盧遮那吉祥妙高次有佛興名一切三昧海普徧光焰師子王次有佛興名普智光明燈次有佛興名普智慧光明法城燈善男子如是等須彌山極微塵數如來其最後佛名法界城智慧燈光王於無垢焰光劫中出興于世我皆尊重親近供養聽聞受持所說妙

法我亦於彼諸如來所出家學道護持法教入此菩薩甚深自在可愛妙音解脫種種方便教化成熟無量衆生從是已來於佛刹極微塵數劫所有諸佛出興於世我皆供養修行其法善男子我從是來於生死夜無明昏寐諸衆生中而獨覺悟令諸衆生守護心城捨三界城住一切智無上法城善男子我唯知此甚深自在可愛妙音解脫如諸菩薩摩訶薩捨離世間諸雜穢語不作二語檢策語業行正直道安住勝義成就圓滿永不繫屬一切語言於念念中開悟一切語言自性深光二入一切語言音海了知衆生諸祕密海明見一切諸法門海普攝一切平等法海出生種種陀羅尼海已得自在隨諸衆生心之所宜而爲說法善巧方便究竟調伏成熟衆生能

普攝受一切衆生巧修菩薩諸無上業深入
菩薩種種法門極微細智能善觀察種種妙
事諸菩薩藏能自在說諸菩薩法何以故已
得成就一切法輪陀羅尼故得名殊勝真實
丈夫而我云何能知能說彼功德行善男子
此菩提場佛衆會中有主夜神名能開敷一
切樹花安樂汝詣彼問菩薩云何學一切智
云何修一切智云何引導一切衆生令其悟
入一切智城爾時守護一切城增長威德主
夜神欲重宣此解脫門義爲善財童子而說
偈言

菩薩解脫深難見 虛空如如平等際
普現無邊法界中 所有一切三世佛
出生無量諸解脫 證入難思真法性
速疾增長無礙智 通達三世慈悲道

卷二

十一

過於刹轉極微劫 時有劫名無垢光
刹號法光吉祥雲 城名普寶拘蘇摩
其中諸佛興於世 量與須彌塵數等
佛號法海大聲王 於此劫中先出現
乃至其中最後佛 名爲法界智燈王
如是一切諸如來 我皆供養聽聞法
我見法海音王佛 其身普作真金色
衆相莊嚴如寶山 發心願得無師道
我暫見彼如來身 即發菩提廣大心
誓願勤求一切智 心等如空法界性
由斯普見三世佛 及以一切菩薩海
亦見刹海衆生海 普徧發起大慈心
隨諸衆生心所宜 一身普現無邊刹
舒光動地徧十方 開悟一切諸含識
見第二佛而親近 亦見十方刹海佛

乃至最後佛出興 名爲法界智燈王
 如是須彌極微數 一切如來咸供養
 於諸刹轉極微劫 所有如來照世燈
 我皆親近而瞻奉 令此解脫得清淨
 爾時善財童子得此菩薩甚深自在可愛妙
 音解脫入無邊三昧海成廣大總持海又得
 菩薩大神通海深入菩薩大辯才海速疾增
 長大歡喜海觀察守護一切城增長威德主
 夜神以偈讚曰

已行廣大深智海 已度無邊諸有海
 長壽無患智藏身 威光普照如滿月
 覺悟法性如虛空 普入三際皆無礙
 念念普緣一切境 心心寂靜無分別
 觀察衆生性本無 大悲常入衆生海
 自在遊於解脫門 廣度羣迷無量衆

卷二

十二

觀察思惟一切法 證入甚深諸法性
 一切聖道普修行 普化衆生令解脫
 天是最勝調御師 開示如來無垢智
 普爲法界諸含識 敷演離塵清淨行
 已住如來諸願道 已入無邊廣大智
 已修一切諸佛力 已見諸佛神通事
 天神心淨如虛空 普離一切諸煩惱
 了知三世無量刹 諸佛菩薩及衆生
 天神一念悉了知 晝夜日月年劫海
 亦知一切衆生類 種種名相各差別
 十方衆生生死處 有色無色想無想
 隨順世俗悉了知 引導令入菩提路
 已生如來誓願家 已入諸佛功德海
 已證法性心平等 隨衆生樂現色身
 時善財童子說此妙偈讚夜神已禮夜神足

遶無數帀殷勤瞻仰一心戀慕辭退而去

大方廣佛華嚴經卷第二十二

光二

十三